

SAN JUAN CARTA NYAFYTEWE'SH

Ītyi caafi'nze'ljwa'ljsa vyaani

1 ¹ Nyafiitey ūsyā'cj yu' tyā'sna caajiyu'ljna fi'ljatstju i'cue'shtyi. Cue'sha' iiwēse'tja'w sa' cue'sh yafyju yuu iuuytja'w. Ī'neerrāa uymée, cue'sh cusejuva iijya'ndytja'w Dyus Nchi'c ĩtyi caafi'nze'ljwa'ljsa's. ² Ityi caafi'nze'ljwa'ljsa' vyaac, atsa' uyrra' tyāa vyaani's cue'sha' pta'shi'tja'w. Tyāasatja'w āchja' i'cue'shtyiva caajiyu'lju', bagachte yujva ptsumée ĩtyi caafi'nze'ljwa'ljsa Ney yacj ūssa cue'shtyi vyaapa'ga. ³ Cue'sh wēse'ljrra yafyjuva uyni's āate pta'shitstja'w, i'cue'shva cue'sh yacj utyaarra fi'nzeczajn, cue'shva ma'wētca'w Dyus cue'sh Tata yacj vite' Nchi'c Jesucristo yacj utyaarra fi'nze' tyā'wēy. ⁴ Tyā'wētja'w caajiyu'ljna fi'lja', i'cue'shva wechana fi'nzewa'lja's ji'pjucajn.

Dyusa' eena'sa'

⁵ Jesucristo na'wēc caapiya'lj tyā'sna i'cue'shtyi pta'shitstja'w: Dyusa' eena'sa'. Tyāa pa'ga tyajy tashte' quīj yujva chji'ndysa meea' jī'c. ⁶ Atsa' maava Dyus yacj fi'nzena ūstju jīrrava, Dyus jycaajni's nwēese'jmée chji'ndyte fi'nzerra', ĩshiisa yuuna. ⁷ Nava Dyusva ma'wē eena'te ūsna tyā'wēy cue'shva eena'te fi'nzete', cue'sh pwe'sh puuty puimée zhichcue fi'nzewa'lj casejena, atsa' Dyus Nchi'c Jesucristo eea' cue'sh pcaltyi jyuca cjucjuna.

⁸ Tyā'jīte', quīj pcal yujva ji'pjmeetja'w jīvā'nja'w na' peequírrāa ya'ĩshiisa yu'nja'w. ⁹ Nava tyā'wē yajcymée, pcalsayujtj sūjna Dyusa's perdon pēyi'nja'w atsa' tyā'wē yūusa's quim yujnava wa'lmée jyuca cytey peltunāyrra ewmeesa's jyuca nuyaateena. ¹⁰ Tyā'jīte' quīj yujva ewmée yūsameetja'w jī'nja'w na' Dyus we'werra': Ewmeesata' jīrra' ĩshiija'c jīsa yu'nja'w.

Dyus tashte cue'sh ju'ngu we'we pu'chsa' Cristo'

2 ¹Andy luuchwe'sh, pcalte fi'nzecajmentju pta'shna fi'ja'. Tyā'wēteva maaí yu' pcalte wetevá'cue nava Dyus tashte cue'sh ju'ngu we'we pu'chsa ji'ptja'w, tyā' Jesucristo' isasa yu's jyuca cytey yuusáa. ²Jesucristoc cue'sh pcal pa'gate vite' naa quiwete nasa jyucaysa pcal pa'gate yā'jrra ya'ducjrra uu.

³Dyus jycaajnyityi's cytey yuuna fi'nzerra yuurráa Dyusa's jiiyujtj sūjwa'ja's ya'ji'pjuna. ⁴Nava maaí yu' Dyusa's jiiitj jīvāana nava tyajy jycaajnyity cytey nwēese'jsame' tyā' išhiisa yuuna. ⁵Maava Dyus jycaajnyity cytey nwēese'jena tyā' Dyus peeygāani's ūuste jyuca ji'pjsarra tyā'wē yuuna. Tyā'wē yuurráa Dyus yacj fi'nzena ūsne'tca'w sūjwa'ja's ya'ji'pjuna. ⁶Dyus yacj fi'nzena ūstju jīsa', Jesucristo na'wēy quij pcal yujva ji'pjmée fi'nzena.

Dyus jycaajni u'sesa

⁷Andy peeygāanisawe'sh, i'cue'shtyi' Dyus jycaajni u'sesa pta'shna fi'jatsmeetj, Dyus jycaajni nyaffi pta'shte iiwēse'lyā'ji'cue tyāafírrá'. ⁸Tyā'wērrava na'wē nyaffi jycaajni's caayaqui'jna fi'jatstju tyā' u'sesa na'wē yuj caseje'c. Tyajírráa i'cue'sha' Cristo's ūusuj jyuca peeygājrra', i'cue'sh pwe'shva tyā'wēy yūuna fi'nzetsi'cue. Tyāa pa'ga āchja' scjēuutsa' jypumbana chji'ndyte fi'nzenisa', atsa' jypumbamée fi'nzeni eena'sa vyaatsa'.

⁹Maaí' jypumbamée eena'te ūstju jīrrava tyajy yacjtjē'ja's atsena, tyā' jypumbana chji'ndyte fi'nzesarra tyā'wē yuuna. ¹⁰Jypumbamée eena'te fi'nzesa' tyajy yacjtjē'ja's ajtsemée peeygājna fi'nzena, quij yujva pcalte cweete'jwa'j yu'sa' vitmée. ¹¹Nava tyajy yacjtjē'ja's ajtsena fi'nzesa' chji'ndyte uyya' ājamée mtee pa'jwa'ja's yuuva jiiimée jypumbana fi'nzesarra tyā'wē yuuna.

¹²Andy luuchwe'sh, i'cue'sh pcala' peltunāynity yuu Jesucristo uute', tyāa pa'gatj fi'ja'. ¹³Tyā'wēy tjē'jsawe'sh, i'cue'sha' na'wē nyaffi entey Jesucristo' ūsyā'cj yu' tyā'sna jiyupa'gatj fi'ja'. Sa' pitstacywe'sh, echtjē'ja's cnayi'cue tyāa pa'gatj fi'ja'.

Andy luuchwe'sh, Dyusa's jiyui'cue tyāa pa'gatj fi'ja'. ¹⁴Tjē'jsawe'sh, na'wē nyaffi entey Jesucristo' ūsyā'cj yu' tyā'sna jiyupa'gatj fi'ja'. Sa' pitstacywe'sh, Dyus pta'shni's ūuste yu'acjrra echtjē'ja's ūucjmée cnayi'cue tyāa pa'gatj fi'ja'.

¹⁵Āchja' cyanzsay mpa'yajcywe, naa quiwetewe'sha's yajcyya'mée. Maava naa quiwetewe'sha's yaacysa' Dyusa's yaacysameerra tyā'wē yuuna. ¹⁶Tyāa pa'gatey naa quiwete' na'wē yaacynisarráa ūsta': naa cacue' canzh yūuna fi'nzeni, yafyju uyrra canzh ūus yaacyni, quijva ji'pjrra' iiwējch iiwējch yajcyyna fi'nzenisarráa ūsta'. Tyā'wē ewmeesa

yuurrá'scu naa quiwe' ūsu', atsa' tyā'wēsa' Dyus jytjāasnisame'. ¹⁷Naa quiwete tyā'wē yūuwa'jrrāana yajcyna fi'nzesa' jyuca ptsuwa'jsata' pety naa quiwe yā'jrra. Nava Dyus jytjāasnirrá's cytey yuusa', bagachte yujva ptsumée ityi fi'nzewa'ja's ji'pjutyna.

Dyus Espiritu' caajiyu'ju'c maa išhiinisateva, tyā'wēy maa isasateva

¹⁸Andy luuchwe'sh, āchja' nmej en ājc. I'cue'sha' iiwēse'jne'cue Cristo's atsesa pa'jana jīni's. Tyāasa āchja' wala kuj ūsta' Cristo's atsesa. Tyāa pa'gatja'w jiyu' nmej en yuutsteva. ¹⁹Tyāawe'sha' cue'sh yacj ūswa'jsamée ne'ta yu', tyāasaty cue'sh cshavyuj casej. Cue'sh yacj ūswa'jsavatsa', tyuteewa'jmée ne'ta yu'. Jyuca yu' cue'sh yacj fi'nzewa'jsameetyna, tyāasaty tyā'wē tyutee.

²⁰Nava i'cue'sha' Dyus Espiritu's ūuste ji'pji'cue, tyāasa maa isasateva tyā'sa' jypumbawa'jsamée i'cue. ²¹I'cue'sha' isasa's jypumbawa'jsamée i'cue naa pa'gafirráatj fi'ja', peecy jii i'cue išhiinisa' bagachte yujva isa caseje'tsme'.

²²¿Quim tyā'wē išhiisa yuucy? Jesusa' Dyus caajnisame' jīna we'wesa tyā'wē išhiisa yuuna. Tyā'wē we'wesa' Dyus Nchi'cnava jypa'gamée yā'jrra', Neynava jypa'gasameerra tyā'wē yuuna. ²³Maava Dyus Nchi'ca's atsesa', Neynava atsesa yuuna. Nava Dyus Nchi'ca's jypa'gasa', Neynava jypa'gasa yuuna.

²⁴Tyají nyaffi pta'shni Dyus yuwe isasa's i'cue'sh ūuste ew mjyaawwe. Tyā'wē yūurra' Dyus Nchi'c yacj tyutemée fi'nzene'cue, sa' Ney yacjva tyā'wēy tyutesamée yuune'cue. ²⁵Atsa' tyā'wē yūusatyi' Jesucristo' peesya' neeyūuc bagachte yujva ptsumée ityi fi'nzewa'ja's.

²⁶I'cue'shtyi maava caypumba'jwe'shtetj pta'shi' jypa'yacycajn. ²⁷Nava i'cue'sha' Dyus Espiritu's ūuste ji'pji'cue na' maa išhiinisana atsa' vite' maa isasateva tjēmée jiyune'cue, tyāa pa'gatey Dyus Espiritu' quījteva jyucac caajiyu'ju', sa' tyajy caapiya'jni' išhiinisameeta'. Tyā'wē jiyurra', Cristo yacj tyutemée fi'nzene'cue.

²⁸Andy luuchwe'sh, āchja' Cristo yacj tyutemée mfi'nzewe. Tyā'wē fi'nzerra', tjaamemée wechana jypa'ga'nja'w Cristo' naa quiwete quījrra vyaateva. ²⁹I'cue'sha' jiiyā'jji'cue Jesucristo' quījteva jyuca ew yūusaateva, atsa' maava tyāa na'wēy quījteva jyuca ew yūuna fi'nzerra', Dyus luuchrra tyā'wē yuuna.

Cue'sha' Dyus luuch yā'tja'w

3 ¹Dyus peeygāani' seena' yuj wala' tyā'sna miiyajcywe. Tyā'wērrafic andy luuchwe'sh jīna cysusu' cue'shtyi'. Atsa' cue'sha' tyajy luuch yujtja'w. Tyāa pa'gaty naa quiwetewe'sha' cue'shtyi' jiyu'tsmée, Dyusa's jiimeeta' naa pa'ga. ²Andy peeygāanisawe'sh, cue'sha' Dyus luuch yā'tja'w. Nava Cristo quījte', ma'wē seena' zhichcue neeyūuwa'jsa

ne'tca'w tyāa yu'sa' ūus yajcyrra cpajcyya' yu' āja'tsmeetja'w. Nava Jesucristo vyaate', tyāa ma'wēsate' wej yujva fiymée tyāa na'wēy neeyūuwa'lj yu'sa' jii'tja'w. ³Atsa' maava tyāa na'wēy yuu wēesa' pcal jii'pjimée fi'nzena, Jesucristova ma'wē quīj pcal yujva jii'pjmeesana tyā'wēy.

⁴Maava pcalte fi'nzesa' Dyus jycaajnyity nwēese'jmée ūsrra tyā'wē yuuna, atsa' Dyus jycaajnyity cytey yuumée ūsni' pcal írrá'. ⁵I'cue'sha' jii i'cue Jesucristo' cue'sh pcaltyi tyujndeya'c naa quiwete quīj, nava tyāa yu' quīj pcal yujva jii'pjmeesac yu'. ⁶Tyāa pa'ga maava Jesucristo yacj fi'nzesa' pcalte fi'nze'tsme!. Atsa' maava pcalte fi'nzesa' Jesucristo's iuymeena, sa' tyāa ma'wēsateva jiimeesarra tyā'wē yuuna. ⁷Andy luuchwe'sh, mpa'yajcywe, i'cue'shtyi maava caypumba'jwe'shte. Jesucristo na'wēy ew yūuna fi'nzesa yuurráa, ewsa yuuna. ⁸Nava pcalte fi'nzesa' echtjē'j yacj ūssarra tyā'wē yuuna, tyāa pa'gatey echtjē'ja' nyafiitey pcalsac yu'. Tyajírráac Dyus Nchi'ca' echtjē'j mjīini's iviituya' quīj naa quiwete.

⁹Dyus luucha' maa yujva pcalte fi'nze'tsmeeta', tyāa pa'gatey tyāawe'sh ūusa's Dyus yu'ptejrra nviitnisata' naa pa'ga. Tyāasa pcalte fi'nzewa'jsameeta' Dyus luuch yā'ja'. ¹⁰Tyāa pa'gac ya'jiyu' maa Dyus luuchteva. Sa' maa tyā'wē echtjē'j luuchtyiva ya'jiyu'c: Maava ewmeerráa yūuna tyajy yacjtjē'jwe'shtyi ajtsena fi'nzesa' tyāawe'sha' Dyus luuch meeta'.

Teechsa na'wērraj puuty ya'peeygājna fi'nzewa'ja'

¹¹I'cue'sha' Cristo caapiya'jni's iiwēse'jne'cue tyā' na'wēc yu': Teechsa na'wērraj puuty ya'peeygājnac fi'nzewa'lj yu'. ¹²Echtjē'j yacj ūssa Caina' tyajy nyacja's icjcu, nava cue'sha' tyāa na'wēy yuuwa'jsameetja'w. ¿Quīj yuutege icj vacy? Cain mjīini' ewmeec yu', atsa' nyacj mjīini' ewsa yu' tyāa pa'ga yuurráac icj.

¹³Andy yacjtjē'jwe'sh, cuj yaacynuwe naa quiwetewe'sh ajtseteva. ¹⁴Tyāa pa'gatey cue'sha' vituwa'lju casejrra bagachte yujva ptsumée ityi fi'nzewa'tje pa'lsatja'w, tyāasa írráatja'w yacjtjē'jwe'shtyi peeygāja'. Nava maava tyajy yacjtjē'ja's peeygāasame!, tyāa vituwa'lju casejsameerra tyā'wē yuuna. ¹⁵Maava tyāawe'sh yacjtjē'jwe'shtyi ajtsena fi'nzesa', nasa's icjsa na'wēysa írrá'. Atsa' i'cue'sha' jii i'cue nasaa icjsa' quim yujva ptsumée ityi fi'nzewa'ja's jii'pjumeetyna. ¹⁶Jesucristo' cue'shtyi peeygājrra nwe'weya' tyajy ityi fi'nzeni's iviituc. Tyāa tyā'wē peeygāani yaase!. Atsa' cue'shva tyā'wēy cue'sh yacjtjē'jty peeygājrra cue'sh ityi fi'nzeni's iviituwa'lj jii'ptja'w. ¹⁷Nava cue'sh yacjtjē'j peeiina ūste uyrrava quijrráava iijytyujndemeerra!, ¿ma'wē Dyus peeygāani's cue'sh ūste jii'ptja'w jīya' ājacytja'w? ¹⁸Andy luuchwe'sh, cue'sh peeygāani' yuwejurráa peeygāa we'wewa'ljme!. Isa peeygājatsrra, āate caavya'jal'jwa'ja' quijrráava pu'chna.

**Cue'sh ũuste ewrráa ũusutjerra', Dyus dyi'pte
jypumbamée ũuste tyá'wē yuuna**

¹⁹Tyá'wē yūurra', isa Dyus luuchrra tyá'wē yu'nja'w, sa' Dyus dyi'pte va jypumbamée ũsne'tca'w sūjwa'ja's ji'pju'nja'w. ²⁰Nava quijterráava jypumbaatste', cue'sh ũusráa yujva caayaqui'ji'c atsa' Dyusa' cue'sh ũuste jytjaacue ew jiisa' atsa' tyajy dyi'pte ishiiya' ájame'nja'w. ²¹Andy peeygāanisawe'sh, cue'sh ũuste ewrráa ũusutjena atsa' Dyusa' pasuna sūjrra ²²Dyusa's pēyi'nja'w atsa' tyá' jyuca ũsuna tyajy jycaajnyty nwēese'jrra Dyus jytjáasni's cytey yuuna fi'nzesatyi'. ²³Dyusa' na'wē yūuwa'ja'scu jycaaja': tyajy Nchi'c Jesucristo's ũuste jypa'garra, teechna na'wērraj puuty ya'peeygājnac fi'nzecaaj. ²⁴Dyus jycaajnyty nwēese'jsa' Dyus yacj fi'nzesa yuuna, atsa' Dyusva tyāawe'sh yacj fi'nzena. Dyusa' cue'shtyi tyajy Espiritu's peescu, tyāa pa'ga cue'sha' jii'tja'w Dyusa' cue'sh yacj ũswa'jsateva.

Dyus Espiritu's ji'pjsa vite' Cristo's atsewa'j espiritu's ji'pjsa

4 ¹Andy peeygāanisawe'sh mpa'yajcywe, tyá'wē Dyus Espiritu's ji'ptja'w jisatyi' tyá'wē yujtyna sūjmée mfi'nzewe. Tyá'jisatyi' ew jiyuwa'ja' Dyus Espiritu's ũuste ji'pdyijteva jiyuya'. Tyá'wēme' naa quiwete iiméj wala penatsta' Dyus yuwe pta'shsatja'w jīna ishiiina u'jusa. ²Na'jisarráa Dyus Espiritu's ũuste ji'pjsa yuuna: Dyus Nchi'c Jesucristo' cue'sh na'wēy nasaa yuurrac vyaa jīsa yuurráa isa we'wesa yuuna. ³Atsa' Jesusa' cue'sh na'wēy nasaa yuurrac vyaa jīsame', tyá' Dyus Espiritu's ũuste ji'pjmeena, wejyva Cristo's atsesa yuuna. I'cue'sha' iiwēse'jne'cue tyá'jīna we'wesa pa'jatyna jīni's. Tyāasa ũsyá'tja' naa quiwete.

⁴Andy peeygāanisawe'sh, i'cue'sha' Dyus luuchi'cue, tyāasai'cue ishiiisatyi' cnay, tyāa pa'gatey Dyus Espiritu i'cue'sh ũuste ũssa' tjaacue chjāchjasa' naa quiwete ishiiisawe'sh ũuste ũssameerra'. ⁵Tyāa ishiiisa' naa quiwetewe'shta'. Tyá'wērra'ity naa quiwetewe'shrráana pta'shi', atsa' nasa naa quiwetewe'sha' nwēese'je'ty. ⁶Nava cue'sha' Dyus luuchtja'w, atsa' maava Dyusna jiisa' cue'sh pta'shni's nwēese'je'ty. Nava Dyus luuchmeesa', cue'sh pta'shni's nwēese'je'tsmeeta'. Cyaj cue'sha' jiyu'nja'w quim Dyus Espiritu's isa ũuste ji'pjteva, tyá'wēy quim cypumba'jsateva.

Peeygāanisa' Dyus tashuj yuja'

⁷Andy peeygāanisawe'sh, puuty ya'peeygājna fi'nzewa'j ji'ptja'w, tyāa pa'gatey peeygājna fi'nzewa'ja's Dyuscu pees naa pa'ga. Atsa' maava peeygājna fi'nzesa' Dyus luuchta' Dyusa's jiisa. ⁸Dyusa' peeygāasa', atsa' peeygāawa'ja's ji'pjmeesa' Dyusa's jiimeesarra tyá'wē yuuna. ⁹Dyusa' cue'shtyi peeygāani's áate caavya'ja'cj tyajy Nchi'c teechnráasanava naa quiwete caajrra, tyāa nwe'wete' psumée ityi fi'nzewa'ja's cue'sh ji'pjucajn.

¹⁰Na'wē yūunisarráa peeygāani' yaase!: Cue'sha' Dyusa's atsesateva, tyāa yu' cue'shtyi peeygājrrac tyajy Nchi'c macue teechrrásateva cue'sh pcalpa'gate uuwa'jsa vitrra caaj.

¹¹Andy peeygāanisawe'sh, Dyusa' tyā'wē cue'shtyi peeygājte!, cue'shva tyā'wēy puuty ya'peeygājna fi'nzewa'lj jiptja'w. ¹²Quim yujva Dyusa's uysa yu' meetyna. Nava cue'sha' puuty ya'peeygājna fi'nze'nja'w atsa' tyā'wē yūute!, Dyusa' cue'sh ūuste nes yuuna, ats yuurráa cue'shva tyāa na'wēy ew peeygāasa yu'nja'w. ¹³Cue'sha' Dyus yacj nes yuute!, tyāava tyā'wēy cue'sh ūuste nescu yu', tyāa pa'gaírrác tyajy Espiritu's cue'sh ūuste nvijt. ¹⁴Cue'sha' iuytja'w Dyusa' tyajy Nchi'ca's caacj naa quiwete nasaty nwe'wecajn, tyāasatja'w cue'sha' áate pta'shi'. ¹⁵Maava Jesusa' Dyus Nchi'ca' jīna we'wesa' tyā' Dyus yacj ūssarra tyā'jīna, atsa' Dyusva tyajy ūuste nes yuuna.

¹⁶Āchja' jiyutja'w Dyusa' cue'shtyi tyacue wala peeygāani's. Dyusa' peeygāasa!, atsa' maava peeygājna fi'nzesa!, Dyus yacj fi'nzesa yuuna, atsa' Dyusva tyāa yacj nes yuuna. ¹⁷Tyajuc cue'sh peeygāawa'ja's isa jyucate ya'jipjuna ya'pa'ja'. Tyā'wē yūunijū' castigāywa'lj ente' ūucjme'nja'w, tyāa pa'gatey naa quiwete cue'sha' Jesucristo na'wēy peeygāasa yu'nja'w naa pa'ga. ¹⁸Dyus tyacue wala peeygāasa's ¿ma'wē ūucjwa'lj yuucy? tyāa pa'gatey tyajy peeygāanisa' cue'sh ūucjni's jyuca iviitu'c. Atsa' ūucjsa' castigāywa'ljne'tca sūjrra ūucjuna, sa' tyā'wē yaacysa' cue'shtyi Dyus tyacue wala peeygāani's acha ew jiimeerra tyā'wē ūucjuna.

¹⁹Dyus cjuē'lycu cue'shtyi peeygāj, tyāa pa'gatja'w āchja' cue'shva Dyusa's peeygāja!. ²⁰Maava Dyusa's peeygāja'tj jírrava yacjtjē'ja's ajtsena fi'nzesa!, ishiisa yuuna. Peecy yacjtjē'lj uyna fi'nzenisa's ajtserra!, ¿ma'wē yūurra Dyus unimeesa's peeygāja' ājacy? ²¹Dyusa' na'wēc jycaaja!: Dyusa's peeygājatsrra!, tyā'wēy peecy yacjtjē'jnava peeygāawa'ja' jī'c.

Dyus luucha' ewmeesa's nwēese'jmée jyuca cnayu'ty

5 ¹Maava Jesusa' Dyus tashu yuusa Cristona sūjnarráa ūuste yaacysa!, Dyus luuchrra tyā'wē yaaquina. Dyusnava peeygājatsrra!, Dyus luuchtyiva peeygājna fi'nzewa'ja!. ²Dyusa's peeygājna tyajy jycaajnityi' nwēese'jrra!, Dyus luuchtyiva peeygāasarra tyā'wē yu'nja'w. ³Dyusna peeygāani tyā'wē tyajy jycaajnityi' nwēese'jnisal. Tyajy jycaajni' jytjaacue yu' tjēysameeta!. ⁴Maava Dyus luucha' naa quiwete ewmeesa's nwēese'jmée jyuca cnayu'ty. Jesucristo's ūusuj jyuca yaacypa'ga yuurráac naa quiwete ewmeesa's ya'cnayu!. ⁵Maava Jesusa' Dyus Nchi'cna sūjna ūusuj jyuca yaacysa yuurráa, naa quiwete ewmeesa's nwēese'jmée cnayuutyna.

Jesucristo' Dyus nchi'cteva caajiyu'jsa' naata'

⁶Jesucristo naa quiwete quíisa' Dyus Nchi'cteva caajiyu'jsa' naata': Yu'te bautisāyni vite' cluuste uuni. Nava yu'te bautisāynijūrráa yu'

achaméc ew ya'jiyu', naasáa cluuste uuniisa yacj tyāa e'nz jwendsa yacj yuurráac isa ew ya'jiyu' Dyus Nchi'cteva. Tyā'sa' Dyus Espirituc tyā'jī'. Tyajy we'weni' isasata'. 7 Jesucristo' Dyus Nchi'cteva jiisa cielute' tecjta': Dyusa', vite' Jesucristo' írrá', vite' Dyus Espiritu'. Atsa' tyāa tecjsa' tyāa na'wérrarráaty we'we'. 8 Tyā'wēy Jesucristo' Dyus Nchi'cteva jiisa naa quiwete' tecjta': Dyus Espiritu, vite' yu'te bautisāynisa vite' cluuste uuniisa. Atsa' tyāa tecjsa' tyāa na'wérrarráaty we'we'. 9 Pitstjē'jwe'sh pta'shnirráa yujnava isa yuj we'wene' sūjnatja'w jypa'ga'. Atsa' Dyus we'weni' yu' wejy jytjaacue isasa yujna sūjna jypa'gawa'j jiptja'w, tyāa pa'gatey Dyus yuuc we'werra': Jesucristo' Andy Nchi'ca' jī' naa pa'ga. 10 Jesucristo' Dyus Nchi'ca' sūjna fi'nzesa', Dyus Nchi'ca's ūuste jypa'gasarra tyā'wē yaaquina. Nava Dyus we'werra': Jesucristo' Andy Nchi'ca' jīni's maava jypa'gasame', Dyusa' íshiija'c jīsa yuuna, tyā'wē Dyusa' isane' we'we' sūjmeerra. 11 Jesucristo' Dyus Nchi'ca' jīna we'werra', Dyusa' cue'shtyi' psumée ityi fi'nzewa'ja's peescu jīnisa', tyāa yuurráa psumée ityi fi'nzewa'ja's jipjsa' naa pa'ga. 12 Tyāa pa'ga maava Dyus Nchi'ca's ūuste jypa'gasa', psumée ityi fi'nzewa'ja's jipjsa' yuutyna. Nava Dyus Nchi'ca's ūuste jypa'gasame', psumée ityi fi'nzewa'ja's jipjmeesa yuutyna.

Pcal perdon ji'pjmeesava ūsta'

13 Dyus Nchi'ca's ūuste jypa'gasa', psumée ityi fi'nzewa'ja's jipjne'tca'w sūjna jiyucajntju i'cue'shtyi pta'shna fi'ja'. 14 Atsa' tyā'wē yaacysatyi' Dyusa' pasu'c tyajy jytjāasnirrá's pytjaa we'wena pējyte' tyā'sa' ew jīitja'w. 15 Cue'sh pytjaa we'weni's Dyusa' wēse'jna ūsteva ma'wē ew jīitca'w tyā'wēy cue'sh pēyni's jypa'gawa'ja'sva ew jīitja'w.

16 Yacjtjē'j pcalte fi'nzena ūsteva tyāa pcala' perdon ji'pjte uyrra', maava Dyusa's neewe'wewa'ja' tyāa pcalsa pa'gate, atsa' yacjtjē'j tyā'wē fi'nzesa's Dyusa' ityi fi'nzewa'ja's peesuna. Nava pcal perdon ji'pjmeesa ūsta' tyā'wēsate fi'nzena ūste yu', Dyusa's neewe'wewa'ja's jycaja'tsmeetj. 17 Quíjva ewmée yūuni' pcalrrarráata', nava perdon ji'pjta'.

18 Cue'sha' jīitja'w maava Dyus luuch yā'ja' peena yu' pcalte fi'nze'tsme'. Tyā'wē yūuwe'shte Dyus Nchi'ca' tyajy cusetec jyaawu' echtjē'j suwcajmén. Tyāa pa'gac pcalte fi'nze'tsmée.

19 Cue'sha' Dyus luuch yujtja'w, nava naa quiwete nasa jyucaysa Dyusna yajcymée fi'nzesa' echtjē'j cusetewe'shta' tyā'sa' jīitja'w.

20 Jīitja'w Dyus Nchi'c naa quiwete quíjrra', Dyus ityisa's jiyuwa'ja's cue'shtyi ūscu. Tyāa pa'ga Dyus ityisa Nchi'c Jesucristo yacj fi'nzena ūstja'w. Tyāa Dyus ityisa' bagachte yujva psumée ityi fi'nzewa'ja's cue'shtyi peessa'. 21 Andy luuchwe'sh, mpa'yajcywe dyusmeerrá's yaacyni's.